

von Wulf Wager

Schwobale Dackele



Grüß Gottle, liebe Leserle. Ok, dr schwäbische Diminutiv "le", also dia Verkleinerungsform isch scho wichtig. Muggaseckel hört sich halt ne so harmlos a wia Muggaseggele. "Du Daggele" hört sich au netter a wia "Du Volldepp!". Aber was dr MediaMarkt en dr letschta Woch vor dr Eröffnung von dr neue Filiale im neua Schobbingzentr

Milaneo en Stuegert auf große Plakat gschriebe hot, des haut em Fass dr Boda naus.

Dia Werbetextr miassat em Vollrausch gwerkelt han, weil von Schaffa ka mr do net schwätza: "Das Ländle jagt Schnäpple im Mailändle!" So isch's en weiße graöße Lettra uf raode Plakat gstanda. Häh? Wia sollat mir Schwobale Dackele verstandele, was dia Sempeler onsle dole mitteilale wellatle. I ben doch net blödle!

I woiß net, welches Werbeagentürle do drhendr steckt, aber die wurmige Rendviecher soll dr Blitz beim Scheißa treffa. Wia ka mr au. Dr Kommissar Bienzle ond sei Hausmoischer warat scho stereotyp gnuag. Wenn do Tatort aus Stuegert komma isch, no han i mi fremdgschämt für die viele Klischees wia Trollinger, Kehrwoch ond eba des berühmte "le". Aber bei derra MediaMarkt-Werbung, do ben i fascht sprachlos. Mailändle = Milaneo, also kleines Mailand. Ha do muasch scho hirnverkrampft denka. Aber "Schnäpple", des sait koi goziger Mensch em ganza Schwobaland. Dia stellat ons no wia dia graischte Bau-ratempel von ganz Deutschland, IQ knapp über ma Brennsüpple. Jonger Vaddr, dene dät i gern amol d' Levita vrlesa.

Adele ihr liebe Leserle, hend a schö's Wöchle...Grrrr...

Bis näggschd Woch'

Ihr